

ADUN Komtar didakwa suruh peniaga 'balik India'
Malaysiakini.com
January 5, 2011

Kongres India Muslim Malaysia (KIMMA) hari ini kesal dengan sikap perkauman yang ditunjukkan oleh ADUN Komtar, Ng Wei Aik, yang menghina kaum India Muslim di Pulau Pinang.

Pengerusi Badan Perhubungan Negeri KIMMA, Faruk Raja Mohamed berkata, Ng, yang juga setiausaha politik kepada Ketua Menteri, dalam tindakannya bersama penguatkuasa Majlis Perbandaran Pulau Pinang (MPPP) untuk menyita kedai nasi kandar Mohamad Aliyar dua hari lepas telah dikatakan menyebut perkataan "tutup kedai, balik India" terhadap pemilik kedai itu, Syed Kassali Mohamad Aliyar dan beberapa pekerjanya.

"Patutkah seorang wakil rakyat kerajaan negeri melontarkan perkataan berunsur perkauman dan bertindak kasar terhadap rakyat dan beliau tidak profesional dalam melaksanakan tugasnya," katanya kepada pemberita di Georgetown.

Katanya KIMMA meminta kerajaan negeri bertanggungjawab atas tindakan wakil rakyat itu dan memohon maaf kepada kaum India Muslim di negara ini.

Beliau berkata KIMMA akan berbincang dengan Persatuan Pengusaha Restoran Muslim Malaysia (PRESMA) dan untuk mengambil tindakan lanjut terhadap kerajaan negeri pimpinan DAP itu jika mereka mendiamkan diri.

- Bernama

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/152565>